

HEADLINES (EVENING)

1. Mizoram sorkarin Forest Conservation Amendment Act 2023 a pawm tak sut leh tura nawr nana naktuka MNF Party-in Mizoram pum huapa Total Bandh an huaihawt tur chu Joint Civil Society of Mizoram, JCM tiamin pawl hrang hrangin an thlawp.
2. Congress Party chuan Mizoramin FCAA 2023 a pawm tak avangin sorkar laipui chu state chhungah duh ang anga tal theih nan 'Blanket Approval' a lo pe reng a ni thei em tih chhut turin Mizo mipuite an ngen.
3. President Draupadi Murmu chuan sik leh sa inthlak nasa siamthat chu tuna khawvelin a mamawh anih thu a sawi.
4. Cyclone Montha chuan Andhra Pradesh ah ruah, thli leh tuilian a thlen mek.

<><><>

MNF PARTY BANDH

Mizoram sorkarin Forest Conservation Amendment Act 2023 a pawm tak sut leh tura nawr nana naktuka MNF Party-in Mizoram pum huapa Total Bandh an huaihawt tur chu Joint Civil Society of Mizoram, JCM tiamin pawl hrang hrangin an thlawp.

Akashvani Aizawl zawhna chhangin MNF General Secretary, FCAA donaa Action Committee-a Secretary ni baw, Pu David R Lalsawmtluanga chuan naktuk zing dar 6 atanga tlai dar 4 thlenga Mizorama Total Bandh huaihawt tura an inbuatsaihna a kaltluang hle a ti a, Political party leh NGO hrang hrang te hnenah thlawp tura an sawm angin thlawpna an dawng tha a, thenkhat chuan tawngkam mai ni lovin ziak ngeia thlawpna te pawh an dawng a ti a, Mizoram Business Coordination Committee, leh MIMA tiamin sumdawng pawl hrang hrang te, All Mizoram Commercial Vehicle Union tiamin lirtheia eizawng pawl hrang hrangte, zirlai pawl te leh Mizoram university-a zirlai leh zirtirtute hnen atang pawhin thlawpna an dawng tih a sawi a ni.

Hetihlai hian bandh huaihawt tur avanga mahni lo inhmakhua thlawhna leh rel ticket la tawh tiamin mi 200 chuangte chuan MNF office ah special permit an dil angin an pe tawh a ti a, thlawhna leh rel hmanga haw tur te erawh chu Total Bandh tawp hun nghak turin a chah a, chutihrualin dam lohna leh thihna avanga lo haw te chu special permit chhungah ngaihnhathiam turin duty zawng zawng an in hrilh tih sawiin, Total Bandh hlawhtling tak an neih a ring tih a sawi.

FCAA 2023 chuan Mizorama cheng mipui, ramngaw leh nungchate inhumhimna India constitution Article 371G chu engmah lovah a chantir tak avangin Mizoram leilung leh a mipui zawng zawngte an him tawh lova, Mizoram sorkar chuan FCAA chu a sut leh hma loh chuan hma an la dawn tih a sawi.

Byte: MNF General Secretary

Mizorama pawl hrang hrang inzawmkhawm, Joint Civil Society of Mizoram (JCM) pawhin vawiin khan thuchhuah siamin, naktuk-a FCAA 2023 duhloh lantirna leh hnuk let tura phutna atan MNF party in "Total Bandh" an huaihawt tur chu an thlawp an ti a, Mizo mipui zawng zawng, NGO hrang hrang leh Political Party zawng zawng te chu he "Total Bandh" hi thlawp turin an ngen a ni.

FCAA 2023 chu Mizoram leh hnam tan a tha lo takzet a, tun maiah ni lo, nakin zelah Mizoram leh hnam ralna kawng sialtu ah an ngai tih sawiin, Mizoram Assembly in FCAA 2023 a lo pawm tawh chu sut leh ngei turin Mizoram Sawrkar an ngen nawn leh tih an sawi a ni.

PC Party pawhin vawiin khan thuchhuah siamin, an Party Vice President, Dampa by election-a party candidate ni baw Pu K Zahmingthanga chuan vawiin khan Party Office-ah FCAA chu Mizoram tana hlauhawm tak, hnam leh sakhaw himna tichhe thei a nih thu a sawi a, ZPM kaihhruai sorkarin Mizorama hman tura a pawm chu pawl a tih

thu leh he Dan chi PC Party chuan a duh lova, sut leh ngei tura sorkar a phut thu te a sawi a. He Dan sut leh a nih theihna atana hmalakna apiang PC Party in a thlawp thu sawiin, naktuka MNF party in hma a lakna tur pawh party in a thlawp thu a sawi a. Bandh hlawhtlinna atana mahni remchan anga che chhuak turin party mi te a sawm a ni.

<><><>

MPCC

Mizoram Pradesh Congress Committee, MPCC chuan Mizoramin Forest (Conservation) Amendment Act (FCAA), 2023 a pawm tak avangin sorkar laipui chu Mizoram chhungah duh ang anga tal theih nan ‘Blanket Approval’ a lo pe reng a ni thei em tih chhut turin Mizo mipuite an ngen.

Vawiina Aizawl Press Club-a thuhthar thehdarhtute an kawmnaah MPCC thupuangtu Pu Lalbiakzama chuan FCAA Dan thara Section pawimawh lai ber, International Border atanga Km 100 ah he DAN in a huam lo ang a tih hmunte hman theih dan 'Terms and Conditions' a siamah chuan Central Sorkar-in kaihhruaina a siam thin ang zel a ni ang tiin a tlip a ni a ti a, he kaihhruaina bak hi 'Rules' dang an hmu lo tih sawiin, FCAA, 2023 Provision in a huam ve loh takah chuan Rules pawh Sub. Sec.(3) bak chu siam ngai an ti rih lo em ni tih zawhna a zawt a, tuna Mizoram sorkar chuan Restricted Tender Blanket Approval a pek thin ang mai in FCAA 2023 kan lo adopt hian Central sorkar chu Mizoram chhungah duh ang anga tal theih nan 'Blanket Approval' kan lo pe ve reng a ni thei em tih chhut ngun turin Mizo mipuite a sawm a ni.

MPCC Spokeperson chuan he dan siamthatah hian Chief Minister Pu Lalduhoma sawi anga state sorkar thuneihna pek belhna awm reng reng a hmuzo lo tih sawiin, he FCAA, 2023 hi ram venhimna- National Security and Strategic Importance chhuanlama hmangin hmarchhak biala state tenau zawk, Northeast Minority State te paldarh tumna hmanrua a ni a ti a. Sorkar Laipuiin Manipur leh Ladakh a sawisak duh dan enin ngaih a tha thei lo a ti a, National Security leh Strategic Importance issue te chu sorkar tan hmanraw tangkai leh duh zawng tih theihna chhuanlam pawimawh leh tha ber a ni thin tih hi Police a kum 32 zet a thawh chhung khan a hre ve a a hriat thu a sawi bawk a ni.

Pu Lalbiakzama chuan Sakawrdai-a YMA General Conference neih zawh takah khan Chief Minister in kilometre 10 leh hectare 5 tia a sawi te chu a sawi sual angah ngaihsak mai tha a tih thu a sawi a, Mizoram chu a vang lam zaulai berah kilometre 116 anga ngaih a ni a, khawthlang leh khawchhak atangin kilometre 100 pawhtawn chuan a tuam hneh khawp ang a ti a ni.

<><><>

MUCHS

Thla thar November ni 1 atanga Synod Hospital, Durtlang leh John Williams Hospital, Lungleia Mizoram Universal Health Care Scheme (MUHCS) hman a nih theih nan Mizoram Sawrkar leh Mizoram Presbyterian Church Synod chuan thawhhona thuthlung an ziaik.

Health & Family Welfare Minister Pi Lalrinpuui kaihhruaia a office a thawhhona ziahnaah hian Health & Family Welfare Department aiawhin Dr. Lalhriatzuali Ralte, CEO, Mizoram State Healthcare Society leh Mizoram Presbyterian Church Synod aiawhin Rev. R.C. Lalnghakliana, Moderator-te'n an hming an ziaik a ni.

<><><>

THINGTAM

Thingtam avanga Sazu puang chuan Lunglei Dist ah pawh khaw hrang hrangah buh a ei chhe mek a, khaw engemawzatah chuan tura an hrai hma in Sazu hian zan khat thil thua an buh a lo ei zo hman leh vek zel tih an sawi.

Agriculture Deptt chun tun dinhmunah Sazu tur hi Kg 10 bakah Cake pack 20 vel an pe chhuak tawh a, an Office-ah pawh lam theih a nih thu khawthlang hruaitute kal tlang leh AIR Lunglei kaltlang ten an puangzar thin a ni.

Lunglei DAO Pu VL. Hmangaihchhunga chuan Lunglei Dist chhungah nimin thleng khan chhungkaw 147 te buh leh thlai chu Sazu puang in a sehchhia niin report an dawng tih a sawi a, Lunglei Block bikah Vanhneah chhungkaw 11, Bunglemun Block-ah chhungkaw 54, Lungsen Block-ah chhungkaw 82 ten an tuar tawh a ni a ti. Sazu veng tur hian Agriculture deptt lam chuan tur an sem bak tih theih vak an nei lo tih an sawi a ni.

Vaisam VC Secretary Pu Mapuia chuan October ni 16-ah khan Tin 3 hmun vel a a Tai leh kawnglawng an chin lai chu sazu hian an ei zawh sak vek tih sawiin In 60 vel awm naah chhungkaw 4/5 vel buh chu tunah hian a la him ni a khawtlang in an hriatthu a sawi a, chhungkaw tam zawk chuan seng tur a bar an nei dawn ta lo a ni a ti.

Vaisam kahwnu Pi Thlengi pawhin an buh chu Sazu hian a eizawh saka vek tawh tih a sawi a,a sur a sa hnuaia an lo thawh vena a thamral ta mai chu a lungchhiat thlak hle a ni a ti.

Hetihlai vek hian Vanhne khuaa Mualzen ramah chuan Vaki a chhuak a, Vaki rual hian an buh an chilh bung nasa hle a, an mangang hle tih an sawi.

<><><>

GST

Kumin September ni 22 atanga a taka GST dan thar hman tan a nih hnuah dawr thenkhatah thil man ngai a zuar an la tam chhan chu GST registration nei lova sumdawng an tam vang ni a sawi a ni.

Hemi chungchanga Akashvani Aizawl zawhna chhangin GST practitioner Pu R Lalengliana chuan GST nei leh nei indawrtawwna chu Business to Business, B2B tia sawi niin, bungrua an in lei tawnin tax invoice a, a tax chu a thlaleh ni 14-ah ITC GST portal-ah Tax portion zawng a let leh thin a, hei hi sumdawng tan a pawimawh hle a, ITC an khawl khawm hmangin sorkara an tax chhunluh tur a tlahniam thin a ti a, hetihlai hian Mizorama dawrkai leh sumdawng tam zawkte chu GST regsitration nei lo, wholesale lian hnenah wholesale rate a an bungraw zawrh tur te an lak thin avangin ITC let leh tur an neih ve tawh loh avangin a tlawma hralh thei dinhmunah an ding ve lo a ti a, hei hi GST dan thar hnuaiah dawr leh sumdawng thenkhat ten thil man an la tihtlawm ve loh phah a ni a ti. Mipuite pawh GST dan thar hman hmaa thil man leh GST dan thar hnuaia sorkar laipuiin thil man a tih hniam te chu ngaihven a, an dikna chanvo hria a, man tlawm zawkin thil an lei em tih te hriat tum turin a chah a, GST danah cheng 200 chin thil an lei chuan dawrkaite hnenah tax invoice an dil theih avangin a theih chin chinah tax invoice dil thin turin a chah a ni.

Pu R Lalengliana chuan GST dan thar hi mipuiin an hlawkpui ber dawn a ti a, GST registration nei sumdawngte tan hloh tur pakhatmah a awm lo tih sawiin, sorkar chu a chan tam ber tur a ni thung tih sawiin, sorkarin GST a lakkhawm thin a tlahniam dawn tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

CBC OUTREACH PROG

Hmankhat daih plastic hlauhawmna leh hmang lo tura inzirtirna chuCentral Bureau of Communication (CBC), Field Office Aizawl chuan vawiin khan Aizawla Govt. J.L. High School-ah an buatsaih a, An tum ber chu zirlaite leh zirtirtute plasctic atanga thilsiamin an chhehvel chenna a tihblawhhlawh theih dan leh mihring tan a hlauhawm theih dan zirtir a ni a, JL High School Headmaster Pu C. Ngurthantluanga chuan zirlaite chu plastic hman loh chu mawhphurhnaa laa zirna in leh a chhehvel bakah an chhungkhat leh thenawm khawveng te pawh tihhmuh tura a duh thu a sawi a ni.

<><><>

PRESIDENT

President Draupadi Murmu chuan sik leh sa inthlak nasa siamthat chu tuna khawvelin a mamawh anih thu a sawi. Vawiina International Solar Alliance (ISA) Assembly vawi 8-na, New Delhi-a a hawwnaah he thu hi sawiin Pi Murmu-i chuan India chuan sik leh sa inthlak nasa siam tha turin hma a lak thu leh hemi kawngah hian chak takin a kal a ti a. Hman atanga vawiin thelugin Ni chu mihringte nunna hnar leh thahrui petu pawimawh tak a ni a ti a. Khawvel pumah International Solar Alliance chuan hmasawwna chhinchhiahtlak tak thlen chho mek tih sawiin mitin huap hmasawwna kalpui chu hmabak ala nih thu a sawi a ni.

<><><>

CYCLONE MONTHA

Cyclone Montha chuan Andhra Pradesh ah ruah, thli leh tuilian a thlen mek a. Dakar khata km 90-100 inkara na in thli t leh mek nia thudawn a ni. Thlipui hi hmarlam atangin hmarthlang lam panin a tleh a. Zanin hian Kakinada kiang Machilipatnam leh Kalingapatnam a thlen rin a ni a. State sarwkar chuan chhanchhuah hna leh chhawmdawl hna ngawrh takin a thawk nghal a. Cyclone tuar thei tura ngaih thingtlang khuaa chengte chhawmdawl na camp lamah thiarchhuah niin chaw leh tuite pek an ni.

Odisha ah pawh tukin atang khan state chhung chhim lam leh tuipui kamahte tuarh a sur tan a. Hei hi Cyclone Montha in a nghawng niin Chief Minister Charan Majhi chuan Bhubaneswar ah high-level reiview meeting a ko nghal a. Cyclone Montha tleh tur atana inpuahchahnate an thlirho a ni.

<><><>